

FARANDULA

DuoDevorah y Edwin cu disco ariba mercado



**DEVORAH KASHA
EDWIN**

ORANJESTAD(AAN) -- Actualmente por scucha na radio emisoranan na Aruba e cinta cu e duo Devorah y Edwin a lanza ariba mercado. Durante un entrevista cu

representante di Edwin, señor Boerleider, el a duna di conoce cu mas o menos 3 luna pasa despues di e bishita di Devorah na Aruba, el a tuma contacto cu representante di

dicho artista pa mira e posibilidad pa lanza Edwin ariba mercado internacional.

Tabata luna pasa ora cu señor Boerleider a ricibi yamada di e representante di Devorah kende a informe cu nan ta cla pa graba y ki dia Edwin por bin.

A dura mas o menos 3 siman pa a completa e grabacion na Caracas. Segun señor Boerleider actualmente ta cinta ta worde pasa na e radio emisoranan pero dentro di 2 siman e disco lo ta ariba mercado.

Actualmente Edwin ta na Hulanda pa cumpli cu algun compromiso y dia 10 di Mei e lo regresa.

Mientrastanto señor Boerleider a ricibi yamada di Canal 8 cu a mustra interesa pa Edwin actua na dicho canal. Segun Boerleider ora Edwin regresa lo bay hiba combersacionnan cu dicho canal pa mira ki dia Edwin lo por actua.

Señor Boerleider a duna di conoce cu e motibo cu a forma un duo ta pa logra hinca Edwin den e mercado Venezolano.

Pa loko ta trata e plannan pa futuro, señor Boerleider a duna di conoce cu na fin di Mei Edwin lo bin cu un single

grandi "Maxi" consistiendo di 4 pieza. Tambe na comienzo di Augustus Edwin lo bin cu un L.P.

E grabacionnan lo tuma lugar na Venezuela ya cu segun Boerleider e studionan di grabacion na Aruba no ta profesionalmente prepara pa haci grabacionnan pa lanza ariba mercado internacional.

Tambe ta asina cu durante su bishita na Aruba, Wilfrido Vargas tabata busca manera pa drenta den contacto cu Edwin ya cu e ta interesa pa Edwin haci algun grabacion.

Pa loko ta trata e cancionnan, esakinan lo bin na Spaño y Ingles pa asina por drenta e mercado internacional.

Boerleider a duna di conoce cu e tin intencion pa acerca algun artista local y segun informacion cu DIARIO a ricibi ya combersacionnan ta tumando lugar cu Claudius Philips.

Tur cos ta indica cu Edwin Abath lo tin un futuro briyante. Señor Boerleider muy pronto lo viaha pa Curacao pa asina promociona e disco di e duo.

Susanne Boekhoudt cu un 45 pa dia di Mama y Tata

Susanne Boekhoudt un hoben cu den poco tempo a desaroya

cu su cantantenan di carnaval y awor a yega asina leu cu el a

bini cu su prome disco 45 ariba mercado dedica na tur mama y tatanan di Aruba. E disco tin na lado na Mami mi dushi mama composita pa Jossy Herrera y na lado B Papi pabien cu bo dia di awe, tambe composita pa Jossy Herrera.

E cancionnan ta masha bunita mes y ta graba na Watapana Recording y e produccion ta di Sra. Maybel-line Arends-Croes y musiconan cu a compana Susanne den e bunita cancionnan aki ta Dino Croes, Gregory

Croes, Papito Rafael, Emile Kelkboom y Cado v.d. Biezen.

DIARIO FARANDULA ta desea Susanne Boekhoudt tur clase di exito cu su prome disco, y ta spera cu den futuro e lo bini cu mas disconan ariba plaza.

